



6. februar 2017

Inatsisartut Suleriaasianni § 37 naapertorlugu Naalakkersuisunut apeqqutit imaattut matumuuna saqqummiuppakka:

**Naalakkersuisunut apeqqutit Tunngaviusumik Inatsisissamut Isumalioqatigiisitaq pillugu:**

- 1. Naalakkersuisut naatsorsuutiginerlugu, Tunngaviusumik Inatsisissamut Isumalioqatigiisitami ilaasortat nunami maani sumiiffinni assigiinngitsuni innuttaasunik ataatsimiisitsinerni peqataasassasut? Apeqqut akeqquneqarpoq aappamik imaluunniit naaggamik.**
- 2. Naalakkersuisut aalajangerput illuatungiliuttut Tunngaviusumik Inatsisissamut Isumalioqatigiisitaq siulittaasoqarfianut mattunniarlugit innersuussutigalugu sulilluartoqarnissaa. Pilersaarutigineqarnerluni aamma illuatungiliuttut innuttaasut allallu ataatsimiisinneqarneranni mattunneqartarnissaat imaluunniit Naalakkersuisut matumani neriorsuutigisinnaanerlugu, innuttaasunik allallut ataatsimiisinneqanngisaannassasut assersuutigalugu Siulittaasoqarfiup sinniisai kisimik Tunngaviusumik Inatsisissamut Isumalioqatigiisitamut sinniisuussatillugit?**
- 3. Naalakkersuisut isumagissamaarnerlugu pisortat ingerlatsinerat pillugu paasitinneqarsinnaatitaarmut inatsisip tassungalu ilanngullugu allattugaatinut paasiniaasinnaatitaanerup aamma Tunngaviusumik Inatsisissamut Isumalioqatigiisitanit malinneqartarnissaa taamaasillutik tusagassiorfiit innuttaasullu malinnaasinnaaqqullugit isumalioqatigiisitat kiisalu tassani ilaasortaasut innuttaasut aningaasaataannik qanoq atuinersut?**
- 4. Akunnerimmita qassit politikikkuk toqqakkat Tunngaviusumik Inatsisissamut Isumalioqatigiisitani ilaasortat sulinerminnut qaammammut atortassagaat Naalakkersuisut naatsorsuutigaa?**
- 5. Takuneqarsinnaavoq Inatsisartuni ilaasortaareersunik isumalioqatigiisitami ilaasortaatitassaminnik partiit inassuteqarsinnaasut. Inatsisartunut sinniisussat ilaasortassatut inassutigineqarsinnaanerit eqqarsaatigalugu qanormita isumaqartoqarpa?**
- 6. Naalakkersuisut isumaqataanerlutik Demokraatit oqarmata Tunngaviusumik Inatsisissamut Isumalioqatigiisitani ilaasortat akissarsiaqaratik sulissasut? Naalakkersuisut isumaqataanngippata akissummi ersissaaq ajunngitsorsiaq qanoq amerlatigisut tunniunneqartassanersut siulittaasumut, siulittaasup tullianut aamma ilaasortaannarnut.**



**7. "Tungaviusumik Inatsisissamut Isumalioqatigiisitamik pilersitsinissaq pillugu nassuiaaammi" allassimavoq isumalioqatigiisitani ilaasortaasut Inatsisartunut qinigaaqqinngitsuussagunik isumalioqatigiisit qimattariaqaraat. Kisianni aamma saneqqutsisoqarsinnaaneranut aalajangersagaqarpoq. Tassanili allassimavoq isumalioqatigiisit siulittaasoqarfiat isumasiorneqassasoq. Pisariaqarporli siulittaasoqarfimmi ilaasortaasut Inatsisartunut qinigaaqqissimanissaat. Taamali pisoqanngippat tamannalu tungavigalugu nalornisoqarlerpat taava kikkut aalajangiissappat, Inatsisartut imaluunniit Naalakkersuisunngortussat?**

**8. Isumalioqatigiisitani ilaasortaq Inatsisartunut qinigaaqqinngitsuussagalarpat nalilerneqarlunili pineqartoq isumalioqatigiisitani ilaasortaaginnarsinnaasoq, taava Naalakkersuisut qanoq takorloorpaat taassuma qanoq akissarsiaqartinneqarnissaa?**

(Inatsisartunut ilaasortaq Michael Rosing, Demokraatit)

**Tungavilersuut:**

Demokraatini Naalakkersuisut qutsavigerusuppagut Tungaviusumik Inatsisissamut isumalioqatigiisitap suliai sulineralu pillugit § 37 tungavigalugu apeqqutigut akimmatigit. Ajourluartumilli akissutit qaammaasaqarnerulersinngilaatigit.

Aammaarluta naqissusissavarput partiit ilisimasariaqaratsigu Isumalioqatigiisit sunik suliaqartassanersut ilaasortassamik innersuussinnginnitsinni. Isumaqarpugut iluarnerusimassagaluartoq partiit namminneq kiffaanngissuseqarlutik piukkunnerpaassaminnik isumalioqatigiisitani ilaasortassamik innersuussisinnaasuugaluarpata.

Malittarisassalli imaapput amerlanerussuteqartunit aalajangerneqarnikuulluni, ilaasortanngortussat Inatsisartuni ilaasortaasariaqartut, taamaakkaluartorli suliat suussaneri qanorlu annertutiginnissaat paasisariaqarpat piukkussatsinnik inassuteqannginnitsinni.

Oqaatigeriikkatsit kikkut tamat oqartussaaqataanerannik sumiginnaaneruvoq, Naalakkersuisut - "Kalaallit tungaviusumik inatsisissamut isumalioqatigiisitamik pilersitsinissaat pillugu nassuiaat"- mi innersuussutaasut unioqutillugit - aalajangersimammassuk siulittaasoq siulittaasullu tullia naalakkersuisoqatigiinnit inuttalerneqassasut. Taamaattumik kissaatigaarput paaseqqissaassallugu tamanna illuatungiliuttunik mattussineq qanoq annertutigisumik atorniarneqarnersoq.

Siulittaasup tulliatut atorfimmik illuatungiliuttunut tunniussikkut qularnaarneqarsimassagalarpoq, suliap kikkut tamat oqartussaaqataanerat ataqqillugu ingerlanneqarnissaa oqallilluarnertalimmillu. Maannakkulli allaanngilaq ornigineqanngitsoq oqallittoqarnissaa paarlattunilli aalajangikkanik pinngitsaaliilluni atortussanngortitsisoqartalerniarpoq. Tamanna kusananngilaq.



Tamatuma saniatigut ilungersorluta qularnaarusupparput isumaqatigiissutigeriissagipput, inuit partiinit toqqarneqarumaartussat akissarsiaqartinneqassanngitsut. Ilaasortat Inatsisartuni ilaasortatut ajunngitsorsiaqareerput aamma isumaqatigaarput taakku ajunngitsorsiat naammattut. Naalakkersuisulli nassuiaammi tunngavik pingaarutilik unioqqutereermassuk, tassalu siulittaasoq siulittaasullu tullia naalakkersuisoqatigiinnit illuatungiliuttunillu toqqarneqassasut, kissaatigaarput aamma tamatumap ersarissumik akineqarnissaa.

Isumaqarpugut isumalioqatigiisitat sananeqarnerat tulluurtuunngitsoq pissutaalluni Naalakkersuisut Inatsisartuunngitsut pingaarutilinnut aalajangiisartussaammata. Piffissaq atorneqartussa q maannakkut qinigaaffiup sinnerata sivisussusaanut naleqqersuutissagutsigu isumalioqatigiisitat suliatik qiteqquppatigit qinersisoqassaaq. Tamatuma kinguneranik nalorninartunik pisoqariaannaavoq eqqarsaatigineqarsimanngitsunik. Assersuutigalugu akissarsiaqartillugu ilaasortaasoq inatsisartuni ilaasortaajunnaartoq isumalioqatigiisitanili sulii ilaasortaasoq. Ajornartorsiutaanavianngikkaluarpoq pineqarpat ilaasortaq Inatsisartunit ilaasortaajunnaarnersiutisiaqartinneqarpat kisianni ilaasortaajunnaarnersiutisiaqartitaaneq qaangiuppat akissarsiaqartitsisinnaaneq ersarissumik isumaqatigiissutigineqartussaavoq. Aammali kikkut isumalioqatigiisitanii ingerlaannarsinnaanersut pillugu apeqqut nalornissutaalissaaq, ilaasortaq qinigaqqinngitsuussagaluarpat.

Nalunaarutigineqareersutut Demokraatini inassutigissamaanngilarput aalajangersimasumik Tunngaviusumik Inatsisissamut Isumalioqatigiisitamii ilaasortassamik inassuteqarnianngilagut suliaassanut tunngasunik itinerusumik paasisaqanngikkallartilluta.

Apeqqutit akeqquakka ullut suliffiit naliginnaasut qulit iluanni.